

de lù per la segonda vòlta; che in quell temp, come s'è ditt, l'ha ocupaa con la fòrza Pavia e anca tanti alter città. Lù stess dòpo pòcch temp, mazzaa con la spada per on ingann de la soa miee, l'ha miss la fin al sò furor.

V. La terza vòlta da quell disgraziaa d'on imperador Federico primm, rebell a la gesa de Ròma, che, trada giò Spoleto, dòpo avè cattaa sù on grandissim esercit l'ha faa trebulà i Milanés ⁽⁸⁹⁾ per sett ann.

VI. A la fin el s'è acampaa vesin a la città cont el sò esercit, in doe gh'eren quindesmila cavalier ò giò de lì e on gran numer de fant; de fatt gh'era con lù quasi tucc i città de Lombardia e i Todesch e i Toscan; fina el rè de Boemia e tanti alter ducca, marches, cont, vescov e abaa e tanta altra gent; e l'ha circondà la città quasi de tucc i canton. Fin che hann poduu i cittadin gh'hann faa ona resistenza incagnida; ma la tremenda famm, amisa di gran disgrazzi, che l'è bònna deperlee de mett sòtta senza alter combattiment in tra i mur di fortin i guerrier fogos in guerra, l'ha domandaa a gran vos l'ingress del nemis fra i mur de la città. Costrett donca i cittadin da la mancanza de mangià, con la speranza che la città la saria minga stada trada giò da l'imperador; come del rest prometteven fermament tucc i sò princip; in de l'ann mila e cent sessantun, el primm de marz, s'hinn consegnaa lor e sta città al Signor e a l'imperador ⁽⁹⁰⁾. E lù l'ha traa a tòcch completament i altissim mur de la città e i cà, e per cinqu ann de seguit l'ha pesaa credelment in sui spall di cittadin con di pes fastidios; e, ròbba che per nun l'è diventada el peggior e maggior obròbri, i còrp di trii Rè Magi, che in de l'ann tresent quattordes el beato Eustòrg l'aveva trasportaa miracolosament da Costantinòpoli in de la nòstra città ⁽⁹¹⁾, oh che dolor!, hinn staa portaa via da l'arcivescov per la soa città, Colònia, città de la Germania. Perchè hoo dii che per nun l'è diventaa el peggior e maggior obròbri? V'el disi subit: de fatt la forma de la città l'è stada missa a pòst mej de prima; ma el tesòr di reliqui inscì important el segutta a stà lontan de nun.

VII. Oh Milan, oh città nòbil, diventada rossa per el sangu benedett de martir e sant, ti che come on leon te seret abituada a otegnì la pussee alta glòria de la fòrza fra tucc i città de Lombardia, perchè stracca e pestada te sbassaa el coo a l'obròbri de la servitù? Doe l'è